

Presidente di Fundacion Encuentro Prome Bienal di Aruba, Alida Martinez

Arte di nos region a perde un gran artista: Winfred Dania

ORANJESTAD – E siman aki a drenta e tristo noticia cu e artista di origen Arubiano residencia pa basta aña na Bonaire, Winfred Dania (1950) a fayece. E artista talentoso aki tabata yiu di tata Boneriano, y di mama Arubiano. Aki na Aruba e artista di arte contemporaneo y presidente di Fundacion Encuentro Prome Bienal di Aruba, Alida Martinez a expresa na BON DIA Aruba cu arte di nos region a perde un gran artista; y den nomber di e fundacion cu e ta presidi, e ta extende palabra di condolencia na e famia di e artista, y tambe na e gremio di artistanan di arte plastico na Aruba y den nos region.

Winfred Dania tabata un artista cu sigur a skirbi un capitulo den historia di Arte di Aruba y Antia. E experto y critico di arte, sr. Adi Martis den su buki "Arte: Dutch Caribbean Art" cu el a skirbi hunto cu Jennifer Smit, nan a destaca e trabou cu e pintor di arte plastico, Winfred Dania a realisa durante henter su bida artistico. E buki ta bisa cu Dania a wordo inspira door di e personahe mitico Boy Nay, di Frans Booi. Dania ta relata e storia di e personahe aki atreves di su pinturanan.

E personahenan mitologico ta aparece den paisahenan magnifico y surrealista. E elementonan natural manera nubia, flor y formacion di barancanan casi semper ta dominante, y nan ta cubri e canvas den un gama di colo scur. Cambianan di colo ocasional ta sirbi pa reforsa e naturalesa dramático di su cuadranan. □



Riba e potret aki nos por mira un obra di e artista Winfred Dania kende a fayece recientemente. Dania su obra ta destaca e personahenan mitologico cu ta aparece rondona den paisahenan magnifico y surrealista.